

**■ TRIBUNA POLITICA**

# Persunas impedidas lavuran en l'emprim martgà da lavur – ina schanza per tuts

DA HANSJÖRG TRACHSEL,  
PRESIDENT DA LA REGENZA

**I**dat temas che determineschan la discussiun publica per emnas e per mais. Els mobiliseschan ils aderents ed ils adversaris e chaschunan debattas animadas en la glisch ferma da las medias. L'agir statal sto dentant er ademplir incumbensas pitschnas e spectacularas ch'èn zunt impurtantas per singulas persunas, ma che na vegnan strusch remartgadas en la publicitad. Ina tala incumbensa è l'integraziun da persunas cun impediments en il mund da lavur.

**E**n differents lieus dal chantun Grischun lavuran gia intginas persunas cun impediments en l'uschenumnà emprim martgà da lavur. Ellas lavuran en orticulturas u en garaschas, en lavuratori per maschinas agriculas u en manaschis d'electricitad, en administraziuns communalas ubain en chasas da persunas attempadas, en fatschentas da construcziun u en hotels. Ils patrums datan la pussaivladad a questas persunas da collavurar en lur manaschi. Els han chattà per e cun las persunas cun impediments incumbensas ed activitads



ch'ellas san liquidar e ch'èn ina sfida per ellas. E talas incumbensas permettan a las persunas cun impediments da sa participar al mintgadi normal da la lavur en la firma. Questas collavuraturas e quests collavurators vegnan duvrads, er sche lur capacitad da prestaziun è reducida pervia da lur impediment. Ellas ed els adempleschan bain ed en moda fidada lur incumbensas ed èn sa chapescha ina part dal team.

**C**un crear la nova lescha d'integraziun da persunas cun impediments han ils purtaders da las decisziuns politicas dal chantun Grischun manifestà la voluntad da promover l'integraziun da persunas cun impediments en l'emprim martgà da lavur. Quai duai

vegnir cuntanschì cun indemnisar ils patrums che engaschan en lur manaschi ina collavuratura u in collavuratur cun in impediment cun ina contribuziun finanziaria per lur custs d'assistenza supplementars. Oz vegnan sustegnidas circa 40 persunas cun impediments e lur patrums en questa moda.

**I**l chantun sto – sin fundament da la nova lescha d'integraziun da persunas cun impediments – finanziar e garantir las enconuschentas purschidas staziunaras per persunas cun impediments. El paja contribuziuns da gestiun essenzialas a favur da plazzas da dimora e da lavuratori. Cun questa lescha è er vegnida creada la basa per promover e per sustegnair finanzialmain l'engaschament da persunas cun in handicap en l'emprim martgà da lavur. Questa purschida integrativa è a medem temp ina sfida ed ina schanza per tuts. Per quest intent basegni patrums che ristgan da far quest experiment e ch'èn prontos, ensemen cun lur collavuraturas e cun lur collavurators, da porscher ad ina persuna cun in impediment ina piazza en lur ravugl.